

寶閑堂

集

576337
F.21, 40

古之詩人以風化人倫爲本聲調法律自然諧合至者且神而化之後世視文章爲虛器雕飾藻繪之風日盛而斯道微矣余幼即好韻語至四十始略知難易雖天資學力不逮古人遠甚然頗自刻苦以冀有異于言之無物者而未能也暇日排纂成帙斷自辛未以後得古今體詩四百一十有九梓諸家塾嗚呼五十之年忽焉已至慨修名之不立徒欲自見于空言可愧也已乾隆己卯季夏清河張四科自識

寶閑堂集總目

卷一

古今體詩八十七首
起辛未
盡甲戌

卷二

古今體詩九十九首
起乙亥
盡丙子

卷三

古今體詩一百二首
盡丁丑
一年

卷四

古今體詩一百四首
起戊寅
盡己卯



This image shows a blank, aged, cream-colored page, likely an endpaper or flyleaf from an old book. The paper has a slightly textured appearance with some minor discoloration and faint smudges, characteristic of old paper. There are several vertical black lines running down the page, which appear to be part of the book's binding or a decorative element. The overall tone is warm and slightly yellowed, suggesting the age of the document.

漢川居士甲子九月歲小豫



寶開堂集
卷一
贊

大冠如箕望吾子有士不
用今老矣天寒日暮山空
裏獨抱遺經究終始四十
九年窮不死


吳江王藻集句

嘉定楊謙少書

寶開堂集卷一

重光協洽

臨潼 張四科



鳴蟲

鳴蟲傷盛年之易往也閨歲候晚季夏方暑涼
夜園居陰蟲已鳴撫時自感輾轉不寐

趯趯草蟲于彼幽叢微吟宵露潛感涼風鳴機之
子言勤女紅今我不作歲聿其窮

草蟲趯趯于階于城適所願兮維粒維滴吾寧似
之憂思如惄孔懷古人寸陰是惜

微彼蟲鳴曾不失時哀音在野夜如何其人生飄忽衰老隨之微蟲不如吾寧不悲
閨序悠長已復徂夏陰律既中默然代謝感彼哀音徘徊中夜嗟哉吾生終焉不化

秋日過拙公禪室

閒出誰堪詣西風獨爾思偶來雙樹下坐到晚鐘時
野月上偏早涼花歛漸遲閑中此還往二老是心期

南莊東馬

日瑄曰璐昆季

望裏清華水木輕橈小住遊程薔薇港邊潮落鷗

鷁山下秋生入門徑造竹所留客唯當月明苦憶君家兄弟不來臥聽江聲

泊舟江上望金山作

瓜洲渡口雨溟濛消受蘋花一艇風吹盡魚雲山寺出水廊三十六閒紅

送客

翻翻林間葉汎汎水上萍離筵易爲起酒盡雙玉瓶
乘月下津步要渺煙浪闊空江萬里秋孤舟今夜發
朝辭鵲尾渚暮宿桑落洲東風三日便黃鵠斷磯頭
君當卸征帆我復策歸騎有夢倘相思空

寶勝堂集 卷一
到分襟地

訪拙上人不過

荒村新過雨乘興叩花關雙樹鶴初起夕陽僧未
還微風偃修竹隔水露青山誰與開茶宴西牕秋
色閑

雨夜有感

夙愛秋雨聲翦燭恒達曙漸老既殊趨遭身復多
故今夜不成眠悔種芭蕉樹

靳祿

南山道新雪落日長林昏有客逐麋至遇盜方殺

人義憤一以激衆寡寧所論箭如餓鴟叫始各鳥
獸奔惟餘一女子泣拜不成言自慟遭剽刼分與
黃壤親何緣鬼伯手奪得未絕魂卻顧此身外何
以酬斯恩黃者金滿籬白者麥滿園拂衣去弗應
歛越銅人原歸來掩關臥飢腸如轉輪客固飲博
徒作橫鄉里嗔忽焉赴急難猶謂血氣振終乃不
望報此足愧搢紳三老上其事頌者萬口喧縣令
始亦喜擬請旌其門訪諸老博士謂匪素行純四
境多椎埋況可使上聞吾聞爲政要求備不一身
居上示所嚮厥下庶克循殺一警且百舉善遠不

仁俗吏乃罔識安議惟搖脣作詩待詢采直質不
沒真此客曰靳祿櫟陽邨中民

潼關與送者別

我有松楸淚臨岐此重揮前途方浩浩回首獨依
依關勢吞天迴河流逼路微傷心一尊酒翻說送
將歸

雪後登汝州望嵩樓

嵩高山頭玉旆出世畛盡被瑤華封三花二室不
到眼鎮日閉置幃車中汝濱客舍雞上距默念此
願何由從竭來北樓試縱眺隱約聽得伊陽鐘迴

風忽捲雲蓬蓬樹梢殘照開洪濛青天櫛比卅六
峰一一削玉攢芙蓉平田繚白百里近滲金樓觀
明深松正如蓬萊隔清淺三山縹緲凌虛空招招
笙鶴惜不下便欲往問浮邱公平生壯觀推第一
山靈似與精誠通坡仙去官詫海市昌黎南歸禱
祝融微生敢望千載上斯境瓌異將無同少焉嶺
缺吐圓月霜采照耀新磨銅闌干拍徧叫奇絕酒
錢未辦殊匆匆歸來氣豪壓東野安用盤渦訪石
龍

石龍渦在南
潭上見孟集

小除夜至揚州

忽忽歲云暮江鄉乍解鞍松楸嗟閒阻兒女愧團
圞要經和裝敝郵籤共歷殘明朝有椒酒魂斷罷
承歡

玄默渚灘

紫姑卜

越機荆鬼風俗殊或徵休咎恣嬉娛已從除夕懷
青鏡又向元宵賽紫姑翦紙招魂象彼姝蒙巾繫
褰施粉朱固知見嫉殊衆女誰解猶憐怨老奴導
者箕從者帚是謂三姑古爲偶大舞吉仰眠凶何
煩龜筮重相從檐將迎兮綠窻夜神之來兮燈上

下老妯傳語百事宜小姑暗祝今年嫁就中獨有
蕩子妻未得歸期自悲咤對人強笑背面哭重三
更問油花卜

過讓圖作

不知芳序晚終日賞幽偏酒醒梅花下春寒穀雨
前喚晴枝上鳥牽夢渡頭船

時嶺谷竹町諸
君皆往洞庭

可惜殘香

裏空來坐暝煙

題楊吳尋陽長公主墓誌拓本後

廣陵妖亂將寧息天遣楊吳留霸迹生男肯作節
度使生女猶蒙湯沐邑尋陽公主亦天人歐史空

繡未著聞一抔莫問殯宮地千載惟傳諛墓文盡
說西華門外叟揮鉏出貞珉厚吳牛礪角落誰
家剡藤脫字歸吾手迴環誦之劇可憐存歿哀榮
事宛然埋香空記興寧里凋薨還題順義年下嫁
彭城應鼎族隨宦名州屢紆轂劉郎家世亦無徵
合在英雄三十六摩挲往事閑窮究李花又落楊
花後不見永興遭篡時聞呼公主輒含悲亦有芳
儀陷強虜傷心萬里望南箕流落沉淪同斷梗如
爾全歸實天幸銘幽猶得似承平地下芳魂應亦
省休因翠墨感興亡矮本空齋手自裝堪配汝南

墓誌稿臨池開處各生香

余舊藏虞秘監汝南公主誌稿真蹟

松寥閣坐雨

海上風雨來不見雙峰顛經窻犯曉啟萬態紛目
前風起江色黑雨過山光鮮風雨自變幻江山故
依然默與道心契靜結滄洲緣終期謝塵鞅高詠
釣竿篇

雙峰閣

雙峰雙狻猊首宛相向峰罅綴危樓憑矜千里
曠人影落江心屐聲出松上時有峭帆過遙擗佛
燈亮

三詔洞拜焦隱士像

海霞蒸柏林柳雪糝苔磴塞蘿窺石房衣冠尚堪
敬若士抱至嘅炎精失金鏡一語且不得三詔安
可聘茲焉結瓜廬青山爰得姓載拜薦寒泉巖花
復娟淨

采蘋曲

儂家水調歌新翻采蘋曲日暮揚子津無人花似
玉

題簡禪師詩集

師諱睿略茂苑人洪武間曾主天寧講席有爪髮塔在讓園鳴脚樹下其銘則姚榮公筆也今歲從叢書樓鈔得師所著松月軒集因題其後

雙林禮塔十經春今見清詩一卷新日暮碧雲吟
未合舊時松月屬閑人

偶向花宮乞一隅遺銘手埽出荒蕪衍師地下猶
相愧叅得南宗了義無

得山陰舒明府書卻寄

瞻

侯家才子出幽燕花縣風流十載傳再來賀老垂
竿地纔是王郎作序年離憂相望江南北昨日題
書報相憶淒斷飛鴻響遠音愁生落月空梁色彈
琴知爾政成閑清賞何人最往還移尊春水浮蘭
渚采藥秋風上戢山此邑飽聞山水勝況兼地主

寶閣堂集 卷一
逢仙令衙齋雪夜亦休關好待扁舟客乘興

爲具公題松泉清聽圖

喬柯擢圓蓋幽澗注方折老僧靜忘言清響散禪
悅漱石旣潺潺拏風亦獵獵懿此精進身復具廣
長舌微生落塵喧一音難解脫是從松石生抑藉
風水發何日共眠雲半偈請下說

諸葛武侯銅鼓歌同厲孝廉鶚作

精銅巧鑄尺半高腹剝面夸腰微凹雲雷百匝花
紋交非鐸非鐺非錫非鉦鐃是曰銅鼓出谿峒伐之鏜
鎔如鳴磬形完毋煩鞞人鞞聲巨詎必桐魚敲漢

家丞相平不毛天人擒縱一手操當時作此厭醜
虜或云入貢從猗猗丞相宿諳五勝法要使金伏
炎精煬應留此物鎮南土與銅柱并銘勲勞可惜
形製失載記遂爾千載傳聞渚吾聞伏波將軍作
馬式駱越舊器皆鎔銷又聞赫連所鑄圍一丈以
配大夏龍雀刀存亡無據塵劫消較此奚止爭釐
毫況復黔山蒼蒼瀨滔滔逞逞名以銅鼓標定爲
忠武所遺信不僥五溪蠻夷最重此得之能易千
蹄牢納鼓釵長獠女叩醉舞胡旋歌哇咬蘆笙合
奏峒神樂用祈豐歲齊肥磽百年以來蠻運絕流

寶閣堂集 卷一
轉遠上越客舫買歸高齋佐清玩懸以畫簾貫以
偉手持雙杖不敢下安得拊擊同陶匏免使古物
竟受雷門嘲

過曾襄愍公墓下作

蒼莽高原上何年葬度遼佳城猶鬱鬱大樹自蕭
蕭玉帳經如在龍庭虜不驕雅誥多暇日辦賊忽
中宵天馬徠仍阻明珠謗轉囂功名希絕代水火
奈中朝遂令白鳩舞俄聞黃鵠謠人亡嗟殄瘁國
是竟飄搖社覆祠官廢封荒子姓凋牛羊眠落照
鳥雀噪寒飈壞劫閑相弔英魂不可招祁連象邱

壟空比霍嫖姚

城南垂釣

霜落潦痕收獨釣濠清處平生蓑笠心若與滄洲
遇本無羨魚情翻得垂竿趣何當買煙舍投老遂
所慕

鄉人至

我去故鄉久書來輒沾裳艱難喜君至情話宜周
詳邱隴幸安穩田廬定蕪荒收穫近豐儉親戚誰
存亡君言各無恙惟有歲不臧貧者足凍餒富者
勘蓋藏軍興況有程芻蕘胥輸將出門棄妻子安

寶閣堂集 卷一
論雨雪滂沱飽滋我愧流離爲君傷悲來趣置酒
相顧不能觴

悲歌

倚劒悲歌西風滿野白雲飛來黃葉亂下

喜表弟朱十一至自蜀中

萬里蠶叢路愁無見汝期尚憐諸舅在時繫北堂
思楚雪出重險吳醪話載離遙知望鄉淚並落送
行時

送陸主事

錫疇歸蘇州

君帆五湖西我馬三峰北相逢詎相知同是揚州

客揚州歌舞逐番新蟻視豪華只有君婪尾傳杯
渾忘曉纏頭記曲肯嫌貧金盡歲亦暮蕭寺重相
遇袖中一卷詩笠澤家風具多病復誰憐所歡不
相顧典裘風雪裏便買扁舟去歸去名園歲已更
飯牛宮畔課春耕寄聲落拓諸年少莫向江湖載
酒行

寒夜江上

送客廣陵潮回帆爪步驛誰期風雪夜復此扁舟
役遠火五洲明殘月四山白孤客已無眠江樓更
吹笛

寄沈少宗伯 德潛

雅詠東陽沈清風漢代疎斯文方有託高臥比何
如投分忘年輩相思又歲除三都待題序南望渺

愁余

時以玉裁遺文求序未得脫稿之耗

昭陽作噩

朱碧山銀槎歌爲馬丈 曰琯賦

朱提一流出精冶敦琢宛若枯樹椿疑自太古直
雷斧陰火燔後餘空腔吾家博望踞其上翹膝坦
腹高髻鬢下鐫大波引潮汐旁釵小草紛蘭茝諦
觀枝通復節豁虛中漫叩音琤擬用以盛酒信奇

器可屏杯鐙竿爵觥罍缸誰其作者朱華玉妙製
元季噪海邦高賢虞揭留口澤同輩吳謝應心降
巧偷豪奪幸俱免塵揚劫壤吁堪懼流傳古色益
斑駁鹽梅屢爲洗黜黜始自孫退谷旣歸高竹窓
凡今三易主胥文字飲殊饒饒饗檀匣周遭刻名作
倚席徧讀挑冬缸主人滿瀉一酌我瓊花露若流
雲淙更起索題句詎克龍文扛吾聞江南鑄器多
鑄銀 韋蘇州句似從唐代誇無雙所惜一鴟三雅少遺
式豈嘗肖此枿且銜良工象物意艱險何異鑿空
窮叩駝停毫疑思等鍊永縹緲難遇河源姥但願

尊前解我渴羌渴盡傾葡萄萬斛為春江

和家叔木蘭花下感懷

過雨尋春到荒陌木蘭一樹留雙屐對酒都忘南
巷貧看花卻話東城宅瓊枝百尺小園隈辜負春
風幾度開桓公合有攀條歎宣子曾因譽樹來我
聞此語恍記憶兒時遊戲雕闌側渾疑卓筆競書
空絕愛煎酥供漫喫零落山邱固可悲洗杯相勸
且開眉他年此地花重發一酌吾儕更是誰

得王徵君藻歸耗詩以遲之

燕市悲歌白髮新的知心羨在家貧連宵夢去頻

相見前月書來豈未真一片飛花減春色數行回
鴈逆歸人故園櫻筍侵尋好莫尚淹留十大塵

飲魚聯句

小園娛清熙偶俯池上檻中有千里魚陳章游泳

春波澹動搖翠鬣張閔華璀璨錦鱗閃稍稍分客

餐陸鍾輝粒粒隨手糝策策呼既頻張四科洋洋來亦

漸或闖萍頭昂樓錡或在藻口噏或掉尾篴篴章

或貶眼睜睜疑餌或不吞畢誤絮或兼啖相競或

俱沈鍾輝已歎或復嘽貪或恣饕餐四科拙或徒

頗頷羣或媵隨行錡獨或陳直犯五色紛可數章

寶曆堂集 卷一
衆聲微有喰得飽知爾樂華靜觀觸余感莫嫌升

斗窄鍾輝幸免綱罟攬淺莎漾纖纖四科落花浮

點點悠然忽深潛錡風漪淨如簟章

題秦郵女子髮繡大士像

貫華纓絡籠圓相一瓣青蓮壓鯨浪鬢施維摩可
並傳絲繡平原安足況珠湖靜女薛靈芸菩薩鬢
高似鬟雲凭牀嬾伴吐絨侶對鏡翻成斷髮君蒼
華欲泣并刀起膏澤猶存辭櫛縱好將精意注芒
針頓見毫光現纖指深閨十日繡初閑畫藁吳生
伯仲閒斷手何曾惜蟬鬢披圖猶自想風鬟此身

種種無根蒂不如便共心花剝白盡休勞映日梳
脫餘知作誰家髭我亦平生佞佛人輸爾香燈結
淨因題詩自笑頭如葆空有心長向法門

初夏奉陪沈少宗伯行菴讌集

綠陰深處啟閑房自在流鶯喚舉觴蓮社客慚張
秀碩鑑湖人羨賀知章酒邊乍挹清風善林下初
知白日長何事匆匆促歸去滿天梅雨枇杷黃

有所思

朝亦有所思暮亦有所思出門即長路夷險未可
知西北有高樓美人理新粧浮雲相蔽虧白日鬱

寶月堂集 卷一
蒼蒼白日良可惜浮雲任悠悠踟躕返余轡匪虞
自銜羞若有人兮大江溪卷舒以道道在已紛芙
蓉兮佩蘭芷餐金英兮飲玉醴谷神靜守恒不死
馳心結夢昕夕千里欲往從之悠哉江水

憶彈指閣下鶴

綠陰清晝掩閑扉記得企企兩羽衣避客每從花
外轉開籠曾待月中歸長松脩竹依然在碧海青
天何處飛未解忘情被僧笑高樓一鼻倚斜暉

高尚書其佩指頭畫虎歌

房山尚書寫白額使指居然如使筆倏毛鋸齒信

手塗趙邈齷亡罕其匹想當潑墨神先王伏地扶
柱作虎狀須臾晝就凜若生亂葦寒風颯相向吾
聞張顛以頭濡墨書以指作畫古則無披圖惜不
雄談接抵掌長楊從獵初

題鍾馗觀鬼緣竿圖

啣嘈石壁流水漸終南進士頎而髯廣場坐看險
竿戲伎倆狡獪誰憎嫌一鬼仰臥翹一足長竿植
立如膠黏骨騰肉飛一鬼健黃緣疾於上竹鮎全
身橫陳兩手擎颺輪旋轉衣綵綵青冥攀附窺烏
蟾欲墮弗懼厥體殲其下二鬼悉昂面短遂不鳴

鼓不歎一鬼旁觀怖欲死目閉口呀舌矜訥意匠
經營極慘淡陰風吹日摧西崦直逼抉眼黃要叔
突過出游龔翠巖安得都官大手筆仿鬼拔河健
句拈嗟汝老馮實鬼伯變幻萬態眼底兼耽玩此
技有深意要看醜類臨危咄嗚呼百尺竿頭更無
地進步一寸分仙凡

行吟逕中顧見藜蘭數本雜衆草閒感而成

詠

吾園久廢治蕭艾欲遮行倚杖悅幽氣翳石披素
莖無人詎不芳遇賞莫增榮洵婉君子德顯晦恒

守貞荒穢任相冒煙露從所零由來馨香質本忌
當門生

秋日喜閱

華吳廷采余夢易見過

西風小院嫩晴初聯袂欣來問索居猶有黃花能
醉客況經秋雨欲生魚盤餘郭泰三畦韭篋剩虞
卿一卷書肯使相逢慳笑語哀鴻清夜正愁余

京師王曇子手技歌

秋晴訪菊過松寮主人爲助詩情豪喚來朔客好
身手卑衣短後頭虎毛躍劒宋都遇蘭子弄丸吳
市逢宜僚兩錢相擊豈金應長旆屢舞如雪包更

寶開堂集 卷一
請一作雜旋戲槁木枝膏同承蜩斷竹續竹五丈
高置器其上膠粘牢金莖露盤形亭岩嫋嫋不受
風動搖左旋右轉閃將落頓然一舉離竹梢忽復
承之壓欲折青天屈曲橫斗杓移時翻墜分瓦解
入手去地爭分毫嗟爾材藝洵奇絕江湖乞食胡
勞勞從來百技戒淫巧屏之弗御惟 聖朝嗚呼
屏之弗御惟 聖朝豈敢惜爾無所遭

題與姚秀才

世鈺

倡和卷後

夜壑悲難遣吟場數尚能白蘋池聽雨黃葉寺尋
僧觸手花箋在驚心酒座曾五年何忽忽可但哭

良朋

冬夜與家叔小飲

聯吟寒漏下罷酒繁霜降莫惜夜歸遲明月照南
卷

闕逢閣茂

春夜讀韋詩

東風發和煦拂我邱中琴天籟自澹泊泠泠弦外
音雲流歸鴻響月淡梅花林三復企牙曠邈焉千
載深

向夕

寶陽堂集 卷一
向夕荒園裏春風似有情月高梅樹白人立鶴聲
清年矢看初換菟裘喜漸成一杯聊自勸不省薄
寒生

欲雨

紅燈淒變畫檐深雲影漫漫月影沉閑與庭梅話
頻歲花時容易得春陰

送姚

世糾厲志黼

端居念親舊千里寧所期欣此俱命駕悵然復臨
岐法護誠難弟文度是佳兒故人惜已歿不見成
立時話往既魂斷撫今尤涕垂浪走吳復楚不救

寒與飢黍厠父兄行敢盡朋友規讀書男子事富
貴且弗縻百世惟所致僕僕亦奚爲行矣各自勗
勿貽逝者悲

題石刻柳州小像

唐裴何代寫瞻拜識清顏詩筆垂千劫英靈走百
蠻乘時希負鼎失意慨囚山悵望南雲外空餘廟
貌閑

題仇實父畫維摩示疾圖

蒼崖置屋青松圍中有居士被鹿皮示疾非疾神
無虧孰云磊嵬如枯龜叩門來問者誰子寶冠白

寶閣堂集 卷一
象大導師水精月湧面輪滿銀色雲繞身光披妙
香五分作瓔珞天龍八部相追隨蓮座對踞道場
現獅吼不荅真諦垂語言文字頓掃却恒河沙數
天花飛階前跏趺進帝青鉢應是香積如來施吾聞
居士淨名者出家豈必無垢衣法喜爲妻女月上
空寂結舍坊菩提四圓覺病且不染五微塵氣何
由底芭蕉樹指幻身喻苾芻草省奇功治定憫婆
娑諸世界營內趨外均成非風刀解形巨苦罹慈
悲欲乞醫王醫畫工想亦佛弟子揭此妙義傳來
茲展觀恰值裏頭日一笑饒舌題新詩

送春日送蔣孝廉德返嘉興

花落轉殘鶯故人歸興生留春已無計送客復含
情客歸只問江南渡未省春歸向何處行到江南
不見春高樓烟雨迷前路去去總相思相逢指後
期明年花發鶯啼日端望重敲白板扉

湖上

南風獵獵漾清暉打槳澄湖碧四圍幾處柳陰留
客住片時花下忘春歸自因多病拋疎酌尚有輕
寒戀袂衣回首消除二三月紅橋烟雨畫船稀

初夏同人坐讓圃懷王藻京師

鶯老花飛晝掩關夕陽吟嘯共清閑江鄉春事倏
云盡燕市酒人殊未還何意長貧勞白髮亦知久
客厭西山連宵倘有相思夢應記層樓綠樹閒

池上

一片空明影涼浮几席閒花飛人獨坐烟暝鳥初
還種芡宜聽雨看雲忽憶山日長拋卷後時有飯
魚閑

送姪霽暫返故里

移家五載暫相依西望憐渠每色飛生計總疎難
滿笑故鄉雖去未成歸年豐應斷催租吏俗薄宜

關欸客扉行過新阡憑拜掃近聞松柏已堪圍

午日侍太夫人家讌

照眼榴花節候殊芳筵北舍奉歡娛固知白髮安
貧賤敢擬清時狎釣屠浮盃粽香飄薏苡傾杯酒
色泛菖蒲分明還似兒童日與佩長生百福符

連雨獨飲

屋漏夜頻起積水上階除新竹三數竿問訊平安
無終日此寂坐有酒惟澆書堂前可浴雀竈下且
遊魚懼嬰沈溺疾侵淫損微軀何以解我憂時賴
傾一壺豈無華臚念戀此卑陋居底下固有分況

復先人廬

題亡友方秀才

士庶畫松溪釣艇圖

長松覆溪陰風水滿幽聽
棹看青山烟鬟在明鏡
故人昔遺我一幘秋光
淨澄觀起遐想感舊動
微詠人生無百年遊釣
宜遂性終擬覓靈蹤扁
舟恣清興

喜晤舒明府

贈

十年纔一面執手倍情殷
笑我迷花久憐君捧檄
勤東南非往日西北是
浮雲且喜江湖上重尋
鷺羣

早秋齋居

夏寒屏締給秋至殊未知
閑居覽羣化始悟素節
移泥泥蘭上露謾謾松
閒颺玄蟬漸蛻葉朱華
行謝池流光遽如許壯
懷能勿悲旣賴盈尊酒
復倚鳴琴絲微疴亦有
適誤書恒可思持此怡
昕夕任運夫奚疑

題汪秀才

沅

奉護圖爲顧太君壽

豈爲忘憂種采之堪遺親
北堂無悴物芳草亦長
春儉府才名舊潘園樂
事新由來白華潔多在
考槃人

運使盧公

見曾

席間聽談塞外風土

新秋延客開鈴齋涼花瑟瑟零高槐胡牀閑踞徵
往事明珠薏苡曾見排一朝薄謫領更卒三年絕
域垂長綯北方設臺二十九略倣區脫緣邊皆尺
一書遞光祿塞平安火傳京兆街黃雲白草二千
里道路險惡不可階陰山太古耀積雪瀚海萬頃
騰浮靈驚沙四起挾敗鏃髑髏偶語藏枯芟恍聞
黃熊雜青兕寧論怒虎兼飢豺李陵臺上灑鄉淚
姜女祠前多古懷廣磧自占若孤鴈穹廬相蔽如
圓蠹祇應水草可豐足時復氣候能清佳金蓮夏

艷舞蜂蝶地椒冬馥肥羈貌邊塵寧謐樂無事終
日點易朱毫偕近聞安西置都護六師計日收幽
厓存亡繼絕洵盛舉夷凶翦競如遺骸銜枚十道
較鬼疾馳檄四出難時差谷量牛馬住遠牧山積
糒糗連高輦此外種人紛雜處顏狀椎魯非吾儕
酪漿每令卷鼻飲生彘或用利齒齧紅粧少婦固
姑帽竈土為粉楷作釵弓刀便息總力悍冰雪蒙
犯本性諧縱受芻豢忘感激恐被煽惑生離孤合
建大府資鎮攝事重不比防秋差靜聽抵掌久未
罷襟次肌粟寒風颿儲需調發諒已定內安外攘

期無乖 聖主方弄顧龜印索虜未貢流金駟如
公才望應鵲起豈容臥理臨清淮自知小儒乏燕
頷願備一校腰箭韞車攻去歌北庭掃廟飲還侍
南郊紫從軍苦樂就公問醉語刺刺宜遭醫滿浮
羅酒更百罰衙前白月光如揩

野渡

野色到溪盡西風上晚潮草深微有岸村遠久無
橋沙汭歸人集蘆碕喚艇遙中流見明月烟水更
蕭蕭

讓圃讌集送蔣德

歸秀水同用東坡送劉景

文韻

檐聲忽斷山鵲呼小園曉啟香林隅秋花錦石正
娟淨座上有客歌文無歡場未免戀朋友行李且
緩肩僕夫金尊傳喚酒三雅銅壺丁倒箭五扶興
闌錄別促授簡長廊斜照拈吟須憶昨識面便相
賞負性大抵同一迂投分遂期固膠漆忘憂恍若
逢萱蘇文章有神倘可信嗜好與俗何妨殊即今
小別那足惜但恐重逢仍故吾竹閒後夜見明月
知子孤帆過五湖

題徐先生枋

畫天池圖

寶閣堂集 卷一
懸崖插池心清泉浸山趾碧瀾寸寸秋直下不知
底蘋香拂鳥影霞文散魚尾慨想采薇人于焉寄
芳軌

重遊掃垢精舍

昔先大夫
感夢所建

金仙常入夢開林結禪窩撫今水竹勝悼遄霜露
多憶侍二人來清齋養天和香雲散廣宇梵唱流
烟蘿閔凶一朝邁掃跡十年過舊僧亦泥涅老樹
尚婆娑邈焉新阡遠倏爾雙鬢皤悲來自莫遣名
理竟如何

秋齋讀書

閑居寡所營化遷閱草木蘭逕無遺芬藤援有危
綠感茲弱質萎顧已雙鬢禿焚香澹吾慮把卷南
窓讀朝聞倘可幾夕死亦云足萬物有貞脆四時
相往復鬱鬱切雲松亭亭凌霜竹君子務自強庶
保晚凋福

秋夜期余四

夢易不至

雨洗江月清風吹山桂白故人不同醉奈此涼秋
夕重城傳遠柝高樹驚棲翼相待久橫琴露香滿
瑤席

全太史祖望自四明至東馬

曰琯曰璐攝山

風萍一別十年催，不道驂鸞近始回。
海外相傳坡老死，襄陽還訪德公來。
浮生共惜雙蓬鬢，多病休憐一酒杯。
停濁酒杯寄語六朝松下客，青山雖好莫低徊。

禪智寺月夜

海上月初升，坐愛松門靜。
山僧解留客，隔林汲寒井。
四野正蕎花，茫茫雪千頃。

白菊

匆匆重九過，纔綻雪盈枝。
色淺空潭影，香清冷鬢絲。
秋應無澹處，霜到不消時。
寄語素心侶，西風采萸遲。

晚菰

園菰秋更美，酥軟配香粳。
小雪年光近，貧家風味清。
數畦呈晚翠，一蝶下霜晴。
入甕吳鹽壓，行催旨蓄成。

甲戌初冬重觀九日行菴文讌圖感作

開房契集記蕭晨，一燈橫圖妙寫真。
幾輩故交為異物，十年陳迹似前身。
酒懷又惜黃花老，詩境翻憐白髮新。
惆悵卷還無限意，他時傳翫是何人。

漢玉磨兜堅歌

金人炯炯清廟內，一絨在口銘在背。
流觀曾發魯

叟喟炎靈取象琢三代凝脂之質刀百淬具體而
微充雜佩尚口乃窮固明戒金玉爾音亦安手
掌古製有微會不雕不文庶無害

姪馨坦南歸賦此誌喜

茅檐映寒旭乾鵲送好音聯翩宦遊子卸帆淮水
潯上堂拜大母喜極翻霑襟孤露悼自昔榮養
欣在今兩枝丹桂芳十載青雲心諒鑒止足分敢
云薄朝簪繫余媿跣弛世事無所任甘旨幸可致
經訓期共尋暇言一斗酒清風希竹林

王藻至自京師因招同人榮木軒小集

故人五年別歲暮千里歸握手胥舊好睠言奏新
詩既嗟久別離復訴長相思本無長安夢爲爾曾
北馳長安亦何樂朱門誰相知仍賦士不遇況當
垂老時從今拂緇塵勿使污素衣

夕陽

惆悵西窓景易沉更憑高閣散幽襟寒鴉古木無
邊好極浦遙山一半陰黯黯最愁長路客駸駸偏
感暮年心晚晴記得樊川賦獨立蒼茫擁鼻吟

冬日集陸鍾輝晚清軒適有遺以鶴者

用劉貢父觀鴈公廳前雙鶴韻

冰池照堂襟老樹蛻山骨即境有遐心寓目無近
物阿誰遠致海山羣天風乍失意未馴側睨
慚過鳥飢啄梅花尚避人始知神仙之驥有逸態
畫屏錯愛青田真

雅上人自金陵來陸鍾輝招集晚清軒以病

不赴率賦三絕句爲贈

隱几虛堂示疾晨香燈小社喚空頻病根原自因
禪縛羞見南宗了義人

雲海茫茫侍誦經松閒時見白猿聽本師何處周
顓死寂寞空山話舊亭

中洲和上住黃山京江張文貞公
訪之因建話舊亭上人其高足也

鴈字堂藂往劫中師來彈指即凌空誰知十笏維

摩室舊是南朝避暑宮

上人近住清涼寺起九間經樓掘地得
白石舊基檢圖經則南唐翠微宮故址

寒夜與王藻話別

重逢即分手離話夜堂清欲別誠多感相留豈近
情十年燕市客三日故園程好去無忘約扁舟春
水生

寶閑堂集卷二

臨潼 張四科 詰士

旃蒙大淵獻

春日榮木軒作

閑居適晏溫茲辰始春服匡牀一卷書把向梅花
讀甚解求固難大意觀已足所撫非英華肯儷凡
草木臨風三復餘九竅淡生馥睠懷謝膠擾即境
媚幽獨青年易云徂白日亦何速暝色赴西窓長
謠泛芳醪

題趙文度畫五城十二樓圖

圖後題五言詩四絕句
署曰癸丑六月四日爲

茅止生悼陶
姬作並畫

峩峩崑崙山拍浮邱三成樓有十二城有五繡錯
基布環瑤京羣真散居何止八萬四千戶中有一
人窈窕而媚姪蜉蝣暮死舜華朝榮衆生現滅若
泡影下視不啻敝屣輕塵寰遊戲偶然耳掉頭歸
去嫌濁腥欲往從之乏健翮衣帶一水橫滄溟巨
鰲首戴幾點青金銀宮闕雲母屏彩虹駕棟霞連
扃縹緲良足棲神靈朝見海日出乃是窓間粧鏡
明暮見海月升乃是惟中秋燈熒撒沙星光射海
水盡是梁上白玉釘朝思暮望不可即願化精衛

銜石挾木填海平西玄有青鳥默與通微誠飛來
寄消息仙語何泠泠阿環再拜謝深意別後蓬萊
三淺清相思豈不願一見奈子綠髓無由生啖以
九轉導引之上藥授以大洞豁落之真經駐爾顏
鍊爾形道成萬劫如孩嬰已勅預爲鎖一院海山
佳處芙蓉城後期握手定不遠鴨桃花發三千齡

和陸鍾輝
春雨橋晚眺

倚杖流疎鐘斜陽一峰色澗水落梅香松風過橋
碧言迴江上帆投我巖中什宛若聯袂遊春山澹
將夕

清明日出遊

沿門插新柳幾樹叫提壺一夜寒食雨江郊滋綠
蕪偶逢野祭者感之立斯須藉問前村裏誰家有
酒沽

斷針吟爲李秀才道南節母某夫人作

孤兒捧篋泣中有百隻針憶昔課書夜阿母持縫
紆何以表母節視此敗朽鐵開篋時一看孤兒魂
欲絕誰謂針有鋼未抵阿母心不折誰謂針無銑
刺出孤兒眼中血綻衣傷指覆兒寒刺繡易米授
兒餐業成身長母何所空撫斷針慟勤苦

陳章蔣德見過榮木軒試龍井茶

湖上采茶至閑烹向夕暉花陰留客住竹逕散煙
霏小啜話春雨餘清憶翠微豈惟煩倦盡相對澹
忘機

灌園

種菜不盈畝鑿井在隙地亦有灌溉勤豈爲衣食
計閑來繞畦行芸芸葉交翠旬雨偶愆時霑灑未
云匱小休柳陰閒默然翫生意肯與道傍人嘐嘐
辯機事

明簡禪師爪髮塔

寶閣堂集 卷二
亭亭簡公塔突兀層軒前我來理荒穢緬想委順
年外身身始貴踵頂無難捐孰意解脫餘尚茲錮
閉堅異代此寄迹永懷如宿緣茶杯一以酌朗詠
松月篇

懷人二絕句

宇內論詩半老蒼誰從細膩識風光閑評北海尊
前客祇有平生盛孝章

盛秀才錦

九死南荒乍返時殘年風雪復傷離茂陵多病文
章在最賞江東有道碑

全太史祖望

暮歸

平生秉微志亦苦掉塵鞅空齋就暮閑即境成幽
賞對酒林花飛彈琴蘿月上余心本不喧無爲慕
長往

爲王比部

又曾

題龍湫晏坐圖

圖惟跌坐
無山水

龍湫何窅冥注瀑五千尺平生一團蒲對之久神
釋何年辭山中留此雪泥跡是閒有勝果合眼即
身歷本來無名欲了不繫聲色日夕挹飛流嗒焉
泯喧寂

決絕辭

當時妾在阿母家君謂妾似夫容花況君不惜金

寶閣堂集 卷二
如土何怪阿母輕相許入門三日恩頓衰對面相看成九疑自是君心多改易未必容華朝夕異幾回憤欲殞薄命祇恐聲張損君行願充織衽老後房對君今日洗紅粧

題方

士庶畫竹扇

故人妙繪事珍簞有遺踪荒筠蔽沙汭野水貫其中翫之煩襟豁宛與幽境逢夫君不可見把握想清風

倚杖

出門無所詣倚杖獨移時雲木自閑意風江多遠

思側身因看鳥仰面忽吟詩落日蒼茫裏悠然歸去遲

哭程丈

夢星

達人若藏器及壯賦歸休久無玉堂夢時爲竹林遊萬卷老馬託二頃貧未謀脩然乘化去清風滿邛溝

憶自謝公宅弱齡奉高軒旣獲載筆從廿稔誼彌敦荷以忘年雅申之知己言自疚荒學殖觸緒惟聲吞

昨暮枉短札相約泛蒲觴如何一宵隔遽成千載

寶閣堂集 卷二
傷問訊已無及撫榻空霑裳從此文字飲爲公罷
端陽

書姚世鈺
屏守齋遺稿後

弁山蒼蒼水雪雪常夢吳興山水窟醒來何處弔
才人袖裏遺文若冰雪夫君昔賦士不過病榻青
春支鶴骨豈惟墨派繼蓮莊任筆沈詩總奇絕偶
然騎鶴到揚州東塾頻年絳紗設雍容言笑坐春
風磊落襟期映秋月天涯霜露易愁人玉樹生看
一株折遺此人間未見書遽爲天上無期別亡何
喪母我歸秦三歲塵封猶未發昨來始獲踐此諾

棗木深剝濡紙脫延陵挂劒祗悲生敬禮論文真
愧殺便當攜之溯玉湖隻雞絮酒臨其穴魂兮歸
來孰侑之湖上蘋花和露折

嘉興精嚴寺王居士泥金寫一切經成佛塔
歌

鴈王手中一舍利化百千億猶未已阿誰亦具大
神通法施居然妙如此昔有阿育王今有王居士
造塔寫經可相擬王居士寓蕭寺不作頭陀裝仍
住魏塘里誓寫無盡藏宛若累碁子半滿巧能翻
輪相美無比閑拈貝葉蔭樹抄便湧蓮花從地起

人閒稗沙門見之惟瞪視徒願削骨爲筆剥皮爲
紙半偈難成真愧死昨勞淨社乞一軸懸向齋寮
供頂禮吉祥花散絳霄中光明雲生茅屋裏我祝
居士無量壽至今百歲尚兒齒平生所書知幾何
應與胸前念珠似定能生慧慧爲珠了義纍纍貫
珠耳大地山河結想成華嚴樓閣彈指是須知八
萬四千座窳堵波即此六百十九部大乘旨

夕霽

高梧遶舍一碧新月窺簾淡黃莫怨朝來風雨爲
君洗出秋光

與松上人秋泛

小舟剛一葉容與葦花閒野水如僧淨斜陽向客
開采菱傷白雨翦橘約青山風急吹橈轉蕭蕭月
滿灣

金山

中流孤嶼鬱蒼蒼偶喚扁舟到上方一簇林巒連
海氣四圍窓戶納江光直疑風雨能浮動未覺蓬
萊便渺茫不用登臨弔今古鱗魚出網喜初嘗

焦山

浮玉峰遙引客艤海門交峙勢崆峒漫山修竹藏

寶閣堂集 卷二
孤寺出樹危樓俯大江靈境轉因高躅著遊人到
此躁心降遺銘剔罷潮風闊兮鶴飛來忽一雙

聞全祖望死

喪子固知生望絕得書猶未淚痕乾餘年萬一重
攜手有客傳聞已蓋棺當代文章真寂寞平生師
友漸凋殘才名何物遭天忌神理茫茫欲問難

哭樓錡

壯歲論交契嗟君先逝波三年齊贅壻一室病維
摩空歎清才少從來薄命多應銜故人意垂死締

絲蘿

方病亟時授衣為次子聘其幼女蓋古人之義也

九月四日復舉詩會集易諧依袖齋

城東高館此重過無限西風入嘯歌聚散偶然萍
在水凋蕙可奈葉辭柯曹劉老去吟情健嵇阮亡
來感涕多獨向尊前歎才盡祇堪相伴飲亡何

題華山圖

天半山如立窅然巖壑重臥遊殊不意勝槩若相
逢曾冒張公霧遙窺玉女峰此間先隴在鄉思忽
無棕

登高旻寺塔

十里辨輪相聲振金琅璫機舟入古寺百級循梯

寶閣堂集 卷二
枕盤迴七層盡身外空青蒼浮雲拂我面烈風吹
我裳俯瞰飛鳥背平視白日光山川表蔣潤井邑
錯淮揚偉哉此奇觀何啻凌八荒況聞三神山拍
浮海中央應有仙人流招我戲搏桑惜無雙飛翼
極目徒自傷河漢方西傾淡泞闌干傍薄寒不可
留欲下心悵悵

題韓晉公五牛圖

吳牛之族特牯犢牧養合付多田翁蹄岐耳濕厥
角十誰其寫者韓太沖相牛有經應能窮畫法或
與畫馬通八百里駿亦大物豈必神駿輸駟驄黃

麻紙上紛異態一一頸上生陰虹或行或鳴或離
立其一翠鞅朱韜籠收藏曾經趙中令筆勢遠過
幕客嵩當時自晦罕流布奇觀詎意千年逢獨惜
所畫悉肥腴宛三月久在滌宮曷不添寫原藪景
與人俱閑水草中文犧孤犢有得失晉公之意將
焉從嗚呼貞元宇內漸離亂安能放向桃林紅

冬夜寄僧

長宵了無寐忽夢空山境寒月到潭心殘雪在松
頂中有苦行僧燒葉石房靜既覺益相思碧雲路
何永

懷王 梁

王郎三樂誰能識小婦佳兒二頃田手把漁竿無
一事櫻桃湖在臥牀前

榮木軒對雪同余 夢易作

晦朔遽云盡密霰何漫漫光積廣庭素響散枯林
乾圍爐閉虛牖向暮勢未闌澤鴻叫方哀邊馬嘶
正酸詎識明年稔已傷今日寒平生漆室女倚柱
有餘歎凜凜惟候厲感感匪懷安賴爾乘興客清
尊聊罄歡

柔兆困敦

遲舍姪輩不至

殘年傳汝輩聯騎已辭秦何處逢山雪多時滯旅
人愁心連故國遠道入新春悵望紛紛鴈偏當北
嚮晨

包家燈

包家燈奇形巧製年年增裁翦錦綺鏤珠玉經時
累月工夫足只博元宵幾夜看棄之墻角從塵撲
明年別買新燈續揚州市上買一盞應費中人十
家產須知包壯行可比漢丁緩君不見繁華風俗
染貧家竈前亦點紙蓮花

擬古折楊柳辭

郎折楊柳枝
勿勿鞭馬去
不鞭郎馬回
天涯無此樹

舍姪輩至

爲問殘年雪何時
別故鄉燈前話
先隴春草漸應長

題元遺山集後

大蘇仙去劒南歿
繼起堂堂魏帝孫
一代興亡餘野史
千秋風雅在中原
歸來彭澤心何愧
亂後初明淚獨吞
可惜青山久埋骨
文章凋喪竟誰論

二月八日過汪丈玉樞恬齋

不到斯堂久
看成白髮人
年光宜著句
淒斷謝家春

述懷示諸同好

微霰不崇朝
清旭失餘烈
向榮花發枝
含煦禽調舌
熙春漸堪賞
顧已恒如缺
百年慨易往
寸心鬱成結
擬卜江上居
遂屏塵中轍
飢采北山萊
閑釣西洲雪
雖乏卓爾姿
庶秉介然節

花朝後一日抱山堂小集時汪學博棣將入

都王上舍藻亦暫歸吳門

寶閣堂集 卷二
良時嗟易度閑居樂朋友載升君子堂輕寒戀尊
酒細草雨收初芳樹雲開後人生各有務安得長
攜手笠澤入扁舟西山迎馬首離緒忽紛然春風
動楊柳

幽居值春

平生希任運所樂非外役睠此林下居悠然啟初
歷中厨飭尊酒永日偕吟客聞鳥省寒違攀花慨
時及元化諒無私即境微有得逮茲苟寡歡後期
良可惜

瑟居

嬾慢心情稱瑟居日高鶯轉夢回初起來盥漱無
餘事閑對梅花讀道書

登彈指閣

西林此偶詣高閣成孤陟野趣滿危欄終日忘語
默隔竹見梅花謂是春雲白時有微風來妙香一
披拂佛火耿猶明衆鳥啼漸寂忽起別鄰僧村煙
澹將夕

聞獲阿睦爾撒納捷音

露布沙陀外仍傳縛可汗飢鷹颺未遠困獸鬥應
難革面初何補遊魂竟自謾曾膺圭組錫莫冀斧

堪寬昔爾來奔日方開問罪端復仇臣節盡興滅
國恩殫妄挾餘凶起貪圖非意干真王猶缺望絕
域擬雄蟠哭豈因存楚逃寧欲報韓有征赫斯怒
不義鮮能完債帥泉閒憫偏師枕上安事同收處
月功勝斬樓蘭載見陳俘入行聞勞役歡洛陽年
少客今罷請纓歎

可汗猶古之單于也然按通典云可汗亦有位在葉護下者似亦官名

西施詠

西施未嫁日本亦苧蘿姝不省能存越何云更沼
吳顰從衆女效看少一錢輸浣罷臨溪照自驚花
貌殊

昭君詞

千載明妃怨分明畫裏存君王不好色賤妾莫承
恩環佩思巫峽琵琶泣塞垣始知薄命者無分老
長門

春深園居

十畝春園內終朝寄靜觀渾忘芳序積又到百花
殘細雨萍浮沼輕雷笋出欄悠然感羣化寂寂匪
吾歎

六齡童子作書歌爲易四

諧令子武基作

乃公書禿筆萬牀秋山老免思潛藏從來弓冶有

積習奇秀固合鍾兒郎易家阿武超輩行今年始
辨數與方擘窠大字劇老蒼是日上客讌高堂抱
來不滿三尺長風安玉雪何琅琅據按伸紙意開
暇纖手搦管神飛揚心能使臂臂使指左旋右折
分低昂七歲未有五歲強不數齊代江夏王堂中
觀者如堵牆嘖嘖稱善聲沸塘鳳凰出穴具文采
騏驥歷塊成康莊如君此子洵不忝世學可使傳
青箱但恐家難被渠厭臨池工用添須忙

寄家叔真州

聞有扁舟役川涂入望微想停煙際席啟我竹間

靡江水到門碧桃花遠郭飛何人奉吟策行處試
春衣對酒青山暮加餐紫鰕肥移居頻有約乘興
悵翻違散髮開書卷垂楊掃釣磯幾時共言笑終
日在清暉

仙女廟

即酉陽雜俎所
記東陵聖母也

夢回珠館照塵寰知在真妃第幾班高殿雲霞儼
嬪從陰廊風雨慘神姦袞拖河畔芊緜草眉約門
前淺淡山青鳥不來西日下想朝金母甚時還

題周

笠

水田夏木圖

水村新夏佳入畫逾蔥蒨平塍剡翠交高樹團陰

寶閣堂集 卷二
徧悠悠田居子柴門向芳甸幽意昕夕殊清暉晴
雨變草閒臥牯閑林際鳴禽善對此憶江南分明
眼中見

短歌行贈周筮

倪迂范緩不可見周郎六法窺古人江淮久客自
多感筆墨無靈不救貧君不見歙州方秀才君不
見吳郡張供奉或遇或否總飄零絕藝于人亦何
用與君風塵欣握手爲余放筆寫林藪風格肯落
二人後吁嗟乎身後名不如及時酒短歌勸君傾
一斗

題櫻桃訓倡詩後東陳大章蔣二德易四諧

花發櫻桃雨散絲二年主客六篇詩而今吟罷增
惆悵又到紅珠滿樹時

讓圃新夏懷陸鍾輝攝山

林間新雨過衆綠紛沃若不知春已歸猶見餘花
落行吟倚危樓明嵐照江郭中有同心人邈焉久
離索廿年此卜築高會相娛樂果藥俄已繁池臺
宛如昨云胡舍之去令我中懷惡山居寧不佳塵
事翻相縛浮生本羈寓萬緣宜澹泊閑身倘能乞
白水亦可酌何如早歸來邱園共棲託

會葬樓錡還憩鐵佛寺作

夏首草木盛朝露何塗塗聯袂出江郭悽言送喪
車故人實才俊異鄉掩多廬寡妻牽弱女呼搶欲
捐軀白日結層陰綠野變寒蕪靈兮斯已而終古
委荒途平生一哭盡悲來莫能紓歸路經廢刹遺
跡撫楊吳雄圖久寂寞故宅亦邱墟息躬磐石上
聞鐘清晝餘有來本屬幻何往不成虛庶藉無生
理相於消鬱紆

丙子初夏重晤杭編修

世駿

同遊紅橋歸飲

行菴分韻得向字

不刺大

年

二

四

九載分襟一俯仰江北江南鬱相望疎慵況復缺
書題寤寐徒勞祗惆悵抽帆何意住江千載酒相
期泛湖上樓觀暈飛不十步林泉繡錯紛千狀閑
遊不覺日正長劇談轉令神逾王憶昔識君扶風
家一棹南還初被放君如鳴鳳盛羽儀我似轅駒
殊骯髒空煩倒屣迎仲宣那有一言驚叔向庶將
末契託永久豈料重逢非少壯湖中落景忽催歸
竹下閑房復延訪此閒文謙近已疎往日風流苦
難忘景光可愛且留連朋輩堪傷半凋喪曠懷聊
藉綠蟻浮銷魂擬付黃雞唱君來幾日欲迴舟夢

寶周堂集 卷二
裏西湖展行障人生大抵屬飄零蹤跡何妨俱放
浪明年相約遠尋君把酒春風道無恙

月夜作

露濃星淡淨餘昏竹裏高吟置一尊恐有閑人能
見訪滿庭涼影未關門

貞孝篇爲浙江汪氏女作

越國有女美且鬢從容就死貞孝全深閨嬌養十
九年輦褓將結遭變遷良人鬼病朝露先遺言迎
歸侍鬻饘少姑待子其勉焉與君夙世紅絲牽豈
料見面生無緣誓將往哭從下泉忽聞此語聊流

連縱不廟見移所天甘代子職君姑前君姑何意
翻舍旃來迎消息終茫然妾已心許雖未宣懼負
逝者敢自憐和淚自寫絕命篇空腸七日飢火燃
玉骨一把成秋煙里閭聞見胥悲恟實迫之死誰
之愆疇奏 明廷旌其賢表以綽楔祠豆邊貞孝
之名千秋傳

聞湖上荷花盛開

虛堂殘雨日淒淒夢裏澄湖路不迷一泊碧琉璃
影淨荷花開到石橋西

橫塘寂寞幾枝開賀老

謂洪

凋零極可哀縱使清

寶閣堂集 卷二
遊無雨阻也應空棹酒舡回

夏夜過天寧寺觀設盂蘭盆齋

小築傍蓮宇清夜遊有期坐聞微鐘動杖策暗相隨
廣庭明月展高樹華露滋燈采搖繁星香霧散涼颼
崇壇環白足儼奉大導師憫逢災與癘橫實紛黔黎
願以伊蒲味振此沉淪安不落餓鬼道永脫羣生迷
我非佞佛者對之久皈依中外雖殊教仁愛要同歸
苟弗墮乃心能不愧彼緇泠泠起梵唱琅琅卓錫枝
未暇徵人天且復賞威儀徘徊遽云曉河影澹西垂

蕩子行

郎家鏡湖傍妾家蠡臺側雙脚繫紅絲山川不能
隔男兒四方志詎可戀閨房絕憐祖道日未改嫁
時粧郎行無近遠不念空房苦最苦懷中兒生來
未識父牽衣問阿父不歸三十年北胡與南越茫
茫何處邊重趼遠行求略能詳姓氏誰知風裏萍
相遇揚州市兒歸喜相報聞說有新人新人匪盛
顏況妾經苦辛亦有外舍兒雙雙比珠玉何必異
腹生情親原骨肉飯我雙角牛駕我短轅車迎歸
幸同活應勝各天涯人生輕別離不道別離老昔

時芙蓉花今日蘼蕪草

夜坐

星期將近夜涼多罷浴迎風衣薄羅高樹冒雲虹
挂雨畫欄晞髮看銀河

寄蔣德

故人別後久無書河朔銜杯約已虛可獨馬卿稱
善病自緣潘岳愛閑居涼風幾日歸高樹明月多
時掩敝廬爲問鴛鴦湖上客今年魚稻復何如

夏杪別墅酬諸君見過

涼雨云止炎暑告徂翳余懶慢樂是林居凝塵滿

席逕草不除睠焉朋好延首踟躕惠然連袂言叩
荒廬攜手一笑我懷用攄爰展莞簟爰理琴書以
永今朝聊相與娛故我北軒竹木蒙密時有清風
午無烈日散髮披襟高談促鄰善謔載興雄辯屢
屈擷我園蔬摘我林實濁酒盈尊歡言孔暱不有
所述曷申予情茫茫禹甸嗟此愚氓心齊隱逸身
負聖明衣而不蠶食而不耕卜築旣久種樹斯
成微志是諒庶惟友生

新秋早起

秋簟憺無夢未明先索衣林光含露淨河影帶檐

寶閣堂集 卷二
微漸老疎高枕初涼愜靜機盥餘仍散帙塵事滿朝暉

哭長洲盛秀才 錦

平生惟數面澹泊自相親豈意青衿老終傷白髮
貧依劉空有賦薦禰竟無人悵望金閭路西風淚
滿巾

山僧送早桂至

積雨屏塵事端居氣初肅山僧折巖花叩戶憫幽
獨新水浸銅瓶濃芬媚巾服自我別祇林秋風一
何速會當明月夜就爾山中宿

里中三異人詩

張風子

役綳黃冠士瞳方頰紫毫施藥徧近縣行歌皆古
謠道逢病蹙者起之如飛猱 武皇昔西幸接引
升烟霄回首四老人雲中苦相招結屋大元洞宛
然巢父巢終歲據石榻當暑猶絮袍有時空甕中
探得綏山桃

靳毛頭

明經本遺民披髮謂天醉孫登恒自覆袞閱久絕
世家傳伏臘古人怪衣冠異閒出只上冢忍飢不

寶閣堂集 卷二
拾穗曰帽與天梳野處任狂恣何以耗壯心但作
擘窠字

楊姑姑

翩翩一佳人日暮隱空谷玉女挂明星終朝伴幽
獨自從避亂來不省時代速寒衣櫛葉乾晚飯藥
苗馥樵客不相識驚見古粧束謂是秦宮人隔花
倚蒼鹿山深俄易暝石室止之宿中夜百獸號塵
夢何由熟凌晨谷口別姓字播流俗翹首望仙山
白雲空滿目

與宗人某話舊

故里元正會祀同夕陽飲獵記匆匆馬前錦雉援
弓墮河上桴桃對酒紅頻歲離憂頭有雪當時豪
氣耳生風可堪多病松楸遠長作江湖聽雨翁

漢銅鳩車歌

生砂活翠雙輪殷宛然拂羽鳴桑閒是曰鳩車曷
所用嬌兒牽挽青絲綜古來執御備六藝五歲先
知以車戲更肖班班子母形應取平均如一義羅
氏失職輶人亡炎靈象物昭舊章良金寫成質不
寐尚教弄具垂千古佩觿舞勺及青春瓦狗泥車
莫漫陳技無詭遇安身拙直到康強杖玉辰

寶閣堂集 卷二
秋日靜上人院

已公留客處開軒據煙郭竹杪見秋山詩情入寥廓日夕清風生微聞松子落

陳章齋中詠白蘋花

高人非翫物藉以寄清興濯濯汀洲花植此盆池淨微風散香清淺水浮玉瑩恰宜幽居賞況出素心贈遠徵毛公傳閑復柳家詠安得雲溪灣采采遂真性

謝陳三臯惠術

早衰若抱瘵屏居適孱儻故人相念切靈術出手

馨嘗閱紫微序及檢神農經懿哉此聖品刀圭足通靈久餌彡髮固佇待綠髓生緬思亭育際眇眇分微形曼壽無所私天閼復誰令柳子陷世議嵇生即天刑匪云服食疎自致憂患并伊余甘濩落內外忘兼營庶冀去淫僻豈獨希年齡和氣潛滋養悴質還敷榮勉順大化盡不苦二豎櫻平生乏奇骨神仙安可成

過禪智寺

杖策度遠阡香界愜所適披榛泉氣浮陟閣嵐光積浮生厭膠擾賴此契幽閒粲然暮鐘動久之風

篠寂便擬借繩牀談禪永今夕

丙子閏秋二姪馨五姪坦假滿還朝爰賦五

言四章錄別

聖代隆孝治謁帝俱歸來方榮大母養暫翦中
園萊荏苒歲再周終畏簡書催載牘旋鶴禁簪筆
趨霜臺男兒四方志常勉勿低徊臨歧始多感執
手有餘哀

嗟汝兄弟輩孤露自垂髫仰荷高堂訓獲備蓬閣
選衰門實有慶先德良不淺諒弗矜微才慎勿薄
小善中朝久策名安敢謝京輦顧私洵未得菽

水我猶勉

讀書男子業要不關出處四十苟無聞草木懼同
腐自公定多暇略可窺先古緊余早不揣妄冀遊
文圃上攀唐虞際下揖賈馬伍因循遂無成憔悴
仍服賈

職守振微眇衣食歷遭迍所遇雖殊致俱未出風
塵明時政罕闕文化日方新萬一或有補胡
爲稱具臣子期毋徇祿我擬遂甘貧遠別不足歎
行矣各書紳

讓圃八詠

附讓圃記 郡北郭天寧寺側隙地百餘畝竹木蔚
距城不數武而自然深邃若山林閒蓋晉謝文靖公別

墅也以多銀杏故俗有杏園稱乾隆庚午間馬解谷昆季構行菴於其中傍有某氏廢園因從容余以二百千買之而陸南圻亦助成其事取陸張共宅意顏之曰讓園入門軒三楹明蘭菴略禪師退院所居舊名松月今仍之軒後一銀杏樹大蔽半下累白石爲塔即藏簡公爪髮所一碑爲姚少師所作塔銘由軒右入有小樓登之樹色浮空雲影在下曰雲木相參樓樓之右蘿陰如幄一逕出其下曰蘿徑徑盡得小齋曰黃楊館其左由步廊達樓後土岡起伏悉植梅花曰梅坪循岡而右一古井曰遺泉泉上有亭翼然左右修竹數百竿梧桐二三十株曰碧梧修竹之閒落成之日置酒高會自都御史胡公而下凡十六人詩社之集於斯爲盛自是二十年來春秋佳日選勝探幽多在于此四方文人學士知有韓江雅集者未嘗不從遊於行菴讓園閒賞其地之勝而慶余輩之獲結鄰也乃未幾而同人凋喪殆半前年夏解谷亦歸道山近南圻復移家金陵惟余與半查及二三知舊消聲匿影於荒林老屋之中友朋文酒之樂非復曩日矣夫此地隱於幽僻賴謝公輝映前古歷千載而始得余輩徒以一觴一詠流連往復於一時無修遠之名爲之增重而又風流雲散今昔頓殊吁其亦可悲也已不有所述後之人其將何以考諸爰屬嘯城周牧山作圖而余爲之記乾隆二十一年歲次丙子閏九月朔日臨潼張四科識

松月軒

古衲此結茅署名領其要明月出松閒獨夜來相照

簡公塔

茫茫四百年遺此爪髮塔手把松月篇微吟繞三匝

羅逕

高蘿陰蔽日其下多蒼苔返照入空翠幽人閑往來

雲木相參樓

寶閣堂集 卷二
小樓多野趣清曉時一上欄外白雲多微風遞檻
響

遺泉

寒甃始何年終日無人汲愛此一泓清悠然成獨
立

黃楊館

黃楊本珍木厄閨古所哀吾將閉荒館終焉養不
材

碧梧修竹之間

涼風日夕至梧竹澹交陰拂蘚跂磐石弦我膝上

琴

梅坪

平岡數武延春花發寒木冰雪何戕戕宛在空山
曲

高冢歎

路傍高冢葬者誰前朝大老聲名垂秘器曾蒙恩
寵浩寒食今看子孫少已聞神道屬他人定識壘
壘終不保當時謁徧形家言地靈盡謂鍾千年豈
知貴盛不長久自古誰能料身後行人對此歎未
已隔林又見新阡起

寶閣堂集卷二
與王藻話別

疇昔與之子論交俗態空青門爲別久荒館比年
同又買清淮棹將離此夜中林閒坐明月天末響
孤鴻老尚耽佳句貧猶逐斷蓬登樓感王粲獻賦
想揚雄浮世原無定長途或未窮相思今較近莫
惜錦鱗通

冬日別墅中作

閑居非習隱所適塵事捐朝曦恒被褐夜月偶鳴
弦崢嶸歲垂盡彌覺易推遷矻矻不知倦但餘文
字緣時亦負手出行吟柴門前昏鴉半歸樹寒菜

猶棲田鄰僧析妙義野老話豐年遙知沽酒返人
語隔荒煙

爲洪明經

振珂

題紫霞山居圖

居常歌式微忽忽阻貞疾賴此丹青手爲寫故山
出霞舒峰伍伍煙歛溪滴滴窈窕辨林廬蒼茫錯
墟術對之霽病顏聊當采芝朮亦以示孤孫先隱
良可述

登雲木相參樓遲客

古道滿斜陽高樓倚林隙來往自紛然同心渺難
覿前期了無準相望翻成惑悵悵久停尊荒村藹

雲夕

雪後僧房

戶外山雪厚林閒佛火紅齋心對緇侶晏坐松寮
中一潔改羣象峭寒飭微躬既積了非著曰消復
歸空忘言偶槌磬晚食惟挑菰殘景忽返照仰見
東南峰

題陳惟允采菱圖

英英菱花發皦皦菱角生搖搖采菱櫂一一鏡中
行秋風吹袖薄秋水照粧明妾本江南女解唱江
南曲采采玉指傷終朝不盈掬回首羨鴛鴦交眠

沙上熟

寒雞

毛羽本來薄頑寒自不禁長鳴向殘夜最警就衰
心柵上霜應厚窓前月欲沉幸無行役苦慚愧此
微禽

雨雪曲

瀚海交兵久陰山雨雪多自悲寒墮指誰敢怨操
戈朝食瞻孤鴈宵眠挾兩駝和戎思魏絳拜將憶
廉頗雲合傳烽塞冰填飲馬河天驕何日滅空擬
采薇歌

寶閑堂集卷二